

Louis Astruc

Li Caciò



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

A-N-UN AMI

Es bèn verai qu'es tu moun mèstre
Dins lou parla de l' Art divin;
Qu'es à tu que dève de m'èstre
Abéura dòu meiour di vin.

Paure pelegre, caminave,
Ah! la routo èro grando e iéu
Ere soulet, e m'enanave
Aguent au cor lou fiò de Diéu.

Lou sòu brulavo; dins ma tèsto
Lou soulèu tancavo si rai;
A travès la pòusso terrèsto
Mis iue cercavon lou Verai.

Car m'avien di: — Soungé, la terro;
Car m'avien di: — Fum, l'amista;
M'avien di: — Fourtuno, misèro;
E pièi: — Bèn plus aut fau mounta,

Jouvènt, amount, luen, aut, dóumino
La Bèuta que cerco toun cor,
La trouvaras, parte, camino,
E n'escoutes pas lou maucor.

Aquelo femo, aquelo angèlo,
Sa terro es li plant estela;
Soun amista's lis amour bello;
Soun or, li vers escrincela

Parte... — E la routo èro peniblo,
E caminave mau-grat tout,
Souvènt moun esquino se giblo,
Ma set cerco un abéuradou.

— O vierginello, o bèuta puro!
Es-ti luen enca toun palai?
Fau-ti qu'à dous pas de l'auturo
Iéu redavale au garagai?